

Povodom 5. juna – Svjetskog Dana zaštite okoline

09 June 2012

Svjetski dan zaštite okoline obilježava se svake godine 5. juna, a za cilj ima podizanje globalne svijesti o negativnom ljudskom djelovanju na životnu sredinu. Pored toga se ovaj datum irom planete obilježava kao svjetski dan zaštite životne sredine, 5. juni je i dan Udruženja za zaštitu okoline Zeleni Neretva Konjic. Stoga i ove godine kroz svoje aktivnosti udruženje obilježava ovaj datum.

U sklopu svojih ekološko-edukativnih aktivnosti mladih, koje udruženje provodi u općini tokom posljednjih mjeseci, planirano je i obilježavanje 5. juna. Povodom ovog važnog međunarodnog dana, udruženje organizuje izlet na Vrtaljicu za učenike konjičkih osnovnih škola koje su obuhvaćene aktivnostima ekološke edukacije. Pored izleta za konjičke osnovce, Udruženje Zeleni Neretva organizuje i prigodnu video projekciju filma sa ekološkom tematikom za učenike srednjih škola. Projekcija se održava 5. juna u 17:00 sati u amfiteatru Srednje škole u Konjicu, te predstavlja i svojevrsni početak intenzivnije saradnje Udruženja "Zeleni Neretva" i J.U. Srednja škola Konjic.

Inače, još od davne 1972. godine 5. juni se obilježava kao Svjetski dan zaštite životne sredine, a iniciran je od strane Generalne skupštine Ujedinjenih Nacija, te se ove godine obilježava u više od 100 država svijeta. Obilježavanje 5. juna predstavlja jedan od osnovnih načina na koje Ujedinjene nacije podstiču podizanje svijesti o zaštiti životne sredine i pojačavaju političku pažnju i aktivnosti u tom smjeru. Također, cilj je ukazati na potrebu stvaranja ravnoteže između potreba čovječanstva i ograničenih mogućnosti koje planeta može pružiti. Ovogodišnja tema Svjetskog dana zaštite okoliša je zelena ekonomija. Taj pojam se odnosi na industrije i privrede koje svojim djelovanjem doprinose čistijem okolišu i boljoj, održivoj budućnosti za sve nas. Razvoj zelene ekonomije je briga svih nas. Zelena ekonomija je ona koja podrazumijeva najmanje zagađena okoliša i efikasnu potrošnju resursa, a isto je i socijalno inkluzivna.

Najmanje svako od nas može uraditi na Svjetski dan zaštite okoliša je poistiniti dječije igralište ili zelenu površinu ispred svoje zgrade, opredijeliti se za racionalniju potrošnju vode i električne energije, otići na posao biciklom ili pješice, a ne automobilom, ponovno upotrebljavati i reciklirati... I nastaviti tako svih ostalih dana u godini.